

УВС АЙМГИЙН НУТАГ ДЭВСГЭРТ ШИНЭЭР ШАШНЫ БАЙГУУЛЛАГА
БАЙГУУЛАХ, ҮЙЛ АЖИЛЛАГАА ЯВУУЛАХАД ЗӨВШӨӨРӨЛ ОЛГОХ ЖУРАМ

НЭГ.НИЙТЛЭГ ҮНДЭСЛЭЛ

Монгол Улсын Төр, сүм хийдийн харилцааны тухай хуулийг Увс аймагт хэрэгжүүлэх, шүтэн бишрэх эрхийнхээ дагуу иргэд сүм хийд байгуулах, үйл ажиллагаа явуулах зөвшөөрөл олгох, үйл ажиллагааны хугацааг сунгахад энэхүү журмыг мөрдлөг болгоно.

ХОЁР. БАРИМТ БҮРДҮҮЛЭХ

Сүм хийд байгуулах, үйл ажиллагаа явуулах зөвшөөрөл авахыг хүссэн иргэд аймгийн иргэдийн Төлөөлөгчдийн Хуралд дараах бичиг баримтыг Монгол Улсын хууль тогтоомжид нийцүүлэн бүрдүүлж ирүүлнэ.

2.1. Тухайн шашны байгууллага байгуулах шаардлага, үйл ажиллагааны онцлогийг тусгасан өргөдөл

2.2. Төр, сүм хийдийн харилцааны тухай хуулийн наймдугаар зүйлийн 2, есдүгээр зүйлийн 3 дахь заалтын шаардлагыг бүрэн хангаж батлагдсан дүрэм

2.3 Шашны байгууллага байгуулахаар санал нэгдсэн хүмүүсийн хурлын шийдвэр, дэлгэрэнгүй тэмдэглэл

2.4. Шашны байгууллага байгуулахыг анх санаачлагчдын товч бүртгэл /овог, нэр, нас, хүйс, боловсрол, мэргэжил, эрхэлж буй ажил, сургууль, гэрийн хаяг, утас/

2.5. Удирдах байгууллагын гишүүд, ахлагчдын бүртгэл

2.6. Үйл ажиллагаа явуулах байршил, газрын зөвшөөрөл олгосон гэрчилгээ

2.7 Шашны байгууллага байгуулах, үйл ажиллагаа явуулахад шаардагдах байр танхим барих, худалдан авах, түрээсээр ашиглах үеийн нөхцөл болон холбогдох бусад газраас авсан зөвшөөрөл, гэрээ

2.8 Шашны байгууллагаас шашны зан үйлийг явуулахад шаардагдах ном, судар, бусад хэрэгслийн жагсаалт, хөрөнгө санхүүгийн хэмжээ, эх үүсвэр, тусламж хандив зардлын тооцоо

2.9 Шашны байгууллагын зорилго, шүтэж итгэдэг номлолын үндсэн үзэл санаа үйл ажиллагааны зарчим, гадаад харилцааг тайлбарласан танилцуулга

2.10 Шашны байгууллагаас шүтэн бишрэгчид, итгэгчдийн дунд зохиох ажлын гол агуулга, чиглэл

2.11 Шашны байгууллагын номлол сургаал айлдагч гадаадын зөвлөх, багшийн дэлгэрэнгүй бүртгэл, фото зураг, гадаадын иргэн харъяатын асуудал эрхлэх албаны болон ажиллаж буй газрын санал зөвшөөрөл, тодорхойлолт

2.12 Сум, багийн нутаг дэвсгэрт үйл ажиллагаа явуулж буй шашны байгууллагын байршил, лам санваартан нарын үнэмлэхүй тоог харгалзан сумын ИТХ, хорооны Засаг даргын өгсөн санал

2.13 Улсын бүртгэлийн газраас нэр давхцсан эсэхийг тодруулсан лавлагаа

ГУРАВ.ЗӨВШӨӨРӨЛ ОЛГОХ

3.1 Зөвшөөрөл олгохыг хүссэн иргэн энэхүү журмын хоёрдугаар бүлэгт заасан баримт бичгийг бүрдүүлэн аймгийн ИТХ-ын Ажлын албанд ирүүлнэ.

3.2 Шашны байгууллага байгуулахыг хүсэж өргөдөл ирүүлсэн иргэдэд Төр, сүм хийдийн харилцааны тухай хууль болон бусад холбогдох тогтоол шийдвэрийг Хурлын Ажлын алба танилцуулна.

3.3 Буддын шашны сүм хийд, дацан, төв нь Монголын Бурхан шашинтны төвөөс үйл ажиллагааны талаар торхойлолт авсан байна.

3.4 Шашны байгууллага байгуулах хүсэлт гаргасан иргэний шаардагдах бичиг баримт бүрдэл болсон эсэх, Төр, сүм хийдийн харилцааны тухай хуулийн дөрөвдүгээр зүйлийн 8 дахь заалтын дагуу тухайн нутаг дэвсгэрт шинээр сүм, хийд байгуулах шаардлагатай эсэхийг аймгийн ИТХ-ын Нутгийн удирдлага хяналтын хороо хянан үзэж, санал дүгнэлтээ аймгийн ИТХ-ын хуралдаанд оруулна.

3.5 Шашны байгууллага байгуулах, үйл ажиллагаа явуулах зөвшөөрөл олгох, зөвшөөрлийн хугацааг сунгах тухай асуудлыг аймгийн Иргэдийн Төлөөлөгчдийн Хурлын хуралдаанаар хэлэлцэн олонхийн саналаар шийдвэрлэнэ.

3.6. Зөвшөөрлийг хугацаагүй олгоно. Шашны байгууллага үйл ажиллагааны тайлангаа аймгийн ИТХ-д жил бүр танилцуулна. Явуулсан үйл ажиллагаа, хийгдсэн ажлууд, шүтэн бишрэгчид итгэгчдийн тоо болон бусад асуудлыг хэлэлцэн зөрчил илэрвэл зөвшөөрлийг цуцлах хүртэл арга хэмжээг авч болно.

ДӨРӨВ. ХЯНАЛТ ТАВИХ

4.1. Зөвшөөрөл авсан сүм хийдийн цугларалтын үйл ажиллагаанд аймгийн Иргэдийн Төлөөлөгчдийн Хурал, холбогдох төрийн байгууллага хяналт тавьж ажиллана.

4.2. Зөвшөөрөл авсан шашны байгууллага нь батлагдсан дүрэмд нэмэлт өөрчлөлт оруулах үйл ажиллагааны чиглэл, байршил, удирдах бүрэлдэхүүн , ахлагч

нь өөрчлөгдсөн тохиолдолд аймгийн Иргэдийн Төлөөлөгчдийн Хурлын ажлын албанд тухай бүр албан ёсоор мэдэгдэнэ.

4.3. Шашны байгууллага нь лам, санваартан шүтэн бишрэгчдийн тоо, тухайн жилд хийсэн ажлын тайлан, танилцуулгаа жил бүрийн 03 сарын 10-ны дотор аймгийн Иргэдийн Төлөөлөгчдийн Хурлын Ажлын албанд ирүүлнэ.

4.4. Монгол Улсын тусгаар тогтнол үндэсний аюулгүй байдал, иргэдийн зан заншил, үндэсний онцлогт харшилсан аливаа үйл ажиллагаа явуулсан нь батлагдвал тухайн шашны байгууллагын үйл ажиллагааг нь зогсоох хүртэл арга хэмжээ авч, шаардлагатай бол хуулийн байгууллагад шилжүүлнэ.

4.5. Сүм хийд аливаа шашны байгууллагын талаар иргэдээс ирүүлсэн санал гомдол, хүсэлтийг хүлээн авч зохих журмын дагуу барагдуулна.

ТАВ. ШАШНЫ ҮЙЛ АЖИЛЛАГААНД ХОРИГЛОХ ЗҮЙЛ

5.1. Сүм хийд, шашны байгууллага нь үйл ажиллагаагаа зогсоохоор өөрөө шийдвэрлэвэл аймгийн ИТХ-аас зохих шийдвэр гаргана.

5.2. Аймгийн ИТХ-аас аливаа шашны байгууллагын үйл ажиллагааг зогсоосон тухай шийдвэр гармагц татварын болон цагдаагийн байгууллагад албан ёсоор мэдэгдэж хэвлэл мэдээллийн хэрэгслээр нийтэд зарлана.

5.3. Тухайн сүм хийд, шашны байгууллагын үйл ажиллагааг зогсоохоор гаргасан шийдвэрийг эс хүлээн зөвшөөрөл хууль тогтоомжийн дагуу шүүхэд гомдол гаргаж болно.

5.4. Төр сүм хийдийн харилцааны тухай хууль, энэхүү журмын заалтыг зөрчсөн тохиолдолд зөвшөөрлийн хугацааг цуцлан холбогдох хууль тогтоомжийн дагуу хариуцлага хүлээлгэнэ.

---oOo---